

Kakawakin te Ara

Iroun Unimwaane. Russell Ballard

Man te Kooram n Abotoro n te Tengaun ma Uoman

Ti ri ai n uotarake kateira ... ni kamata bwa Ana Ekaretia Iesu Kristo n Bong Aika Kaitira bon te ara are E anga te Uea n ti Ngaia bwa ti na kinaki iai.

Unimwaane Hales, n tei ibukira ni kabane, ti karababa ara tangira ae nano ao ni kakaitau ni menami ikai n te moaningabong aei.

N tain te maungatabu ni kabuta n Eberi ae nako, au iango e okioki iaon kakawakin te ara. Inanon namwakaina aika a tia n nako, tabeman tiibu ataei a bungiaiki nakon ara utu. E ngae ngke a roko ni waekoa nakon are I kona ni kawakinia ataei n tatabemania, a butimwaeaki n riki bwa rakan ara utu. Temanna n tatabemania nako e karekea te ara ae rineaki mairouia ana karo teuanne ke neienne, te ara ae e na kinaaki rinanon maiuna, kaokoroakin teuanne ke neienne mairoun temanna riki. Aio e koaua inanon utu nako, ao e boni koaua naba ibuakoia aaro n te aonaaba.

Te Uea Iesu Kristo e ataia bwa kakawakira kamatan aranakin Ana Ekaretia inanon bong aika kaitira. N te ka 115 n tiekitin man te Doctrine ao Covenants, te Uea bon Ngaia are E arana Ana Ekaretia. “Bwa au Ekaretia e na aranaki ni bong aika kaitira, Ana Ekaretia Iesu Kristo ni bong aika Kaitira” (taraa D&C 115:4).

Ao te Uea are Beniamina e reireinia ana aomata inanon ana Boki Moomon:

“Bwa kam na katoka i aomi aran Kristo, ngkami ni kabane ake kam a tia ni karaoa te berita ae tabu ma te Atua bwa kam na ongeaba ni karokoa tokin maiumi. ...

“Ao I tangiri ngkami bwa kam na uringnga naba, bwa aio te ara are N na katoka i aomi e na aki manga kamaunaki, ma tii rinanon karaoan te bure; mangaia ae taratarai ngkami bwa kam na aki karaoa te bure bwa e aonga n aki kamaunaki te ara aio mai nanomi” (Motiaea 5:8, 11).

Ti katoka aran Kristo iaora n te ran ni bwabetito. Ti kaboua mwin te bwabetito ni katoa wiiki ngkai ti butimwaea te toa, n anganano bwa ti boni kukurei ni katoka iaora aran natim, ma n aki toki n ururingnga (taraa D&C 20:77, 79).

Ti na ataia bwa ti kanga n kakabwaiaki ngaira ni katoka aran ana Rikitemanna te Atua iaora? Ti ataia bwa kakawakira anne? Aran te Tia Kamaiu bon te ara are e a tia n taekinaki iaan karawa are e na kona ni kamaiuaki iai te aomata (taraa 2 Nibwaai 31:21).

N aron are ko uringnga, Beretitenti Boyd K. Packer e kabwarabwara kakawakin aran te Ekaretia inanon te maungatabu ni kabuta n Eberi ae nako. E kabwarabwara bwa “te ongeaba nakon kaotioti, ti aranira bwa Ana Ekaretia Iesu Kristo ni Bong aika Kaitira nakon are Ana Ekaretia Momon” (Kairaki iroun te Tamnei ae Raoiroi,” *Liahona*, Meei 2011, 30).

Ibukin kakawakin bwaninin aran te Ekaretia, I kaokii kaotioti man booki aika a tabu, aia kaetieti Moan Beretitentii inanon reeta ibukin 1982 ao 2001, ao aia taeka Abotoro ake tabeman ake a tia ni kaungaia membwa n te Ekaretia ni kamanoa ao n reireina te aonaaba bwa te Ekaretia e kinaaki man aran te Uea ae Iesu Kristo. Aio te ara are e na aranira iai n te Uea n te kabane ni bong. Bon te ara ae e na ataaki iai kaokoron Ana Ekaretia ma ake tabeua.

I a tia n rangi n iangoa bwa bukin tera te Tia Kamaiu e anga te ara ae ruaiwa—n taeka nakon Ana Ekaretia are e a tia ni kaokaki. E taraa n abwabwaki, ma ngkana ti iangoa kabwarabwarakina bwa tera te Ekaretia, e na taraa ni kimototo, ni koaua, ao n tamaroa. E na kanga te kabwarabwara n kabwaraki ao ni kamatatiki ao ni kateretereaki inanon taeka tabeua?

Te taeka n tatabeua e kaotaki ao n bongana. Te taeka ae Te e kaota onotin nnen te Ekaretia ae e a tia ni kaokaki ibuakoia aaro n te aonaaba.

Te taeka ae *Ana Ekaretia Iesu Kristo* e taekinaki bwa bon Ana Ekaretia. N ana Boki Moomon, e reirei Iesu: “Ao e na kanga n ae au ekaretia ngkana e aki aranaki n arau? Bwa ngkana e aranaki te ekaretia n aran Mote ao ngkanne bon ana ekaretia Mote; ke ngkana e aranaki n aran te aomata ao ngkanne bon ana ekaretia te aomata; ma ngkana e aranaki n arau ao ngkanne bon au ekaretia” (3 Nibwaai 27:8).

Ni *Bong aika kaitira* e kabwarabwara bwa ti te arona te Ekaretia aei n aron ana Ekaretia Iesu Kristo are e kateaki n tain Ana mwakuri ni maiun n rabwata ma e kaokaki ni bong aika kaitira. Ti ataia bwa iai te kekerikaki, ke kitanan te koaua, kakawakin Kaokan Ana Ekaretia ae koaua ao ni bwanin n ara tai.

Aomata aika *Itiaki* nanona bwa ana membwa ake a Iriia ao ni kataia ni karaoa Ana kantaninga, ni kawakin Ana tua, ao ni manga katauraoui riki ni maeka ma Ngaia ao Tamara are i Karawa ni boong aika a na roko. Aomata aika Itiaki e kaineti nakoia ake a ukora karaoan maiuia bwa e na tabu mani berita bwa a na irira Kristo.

Te ara are e anga te Tia Kamaiu nakon Ana Ekaretia e tuangira ni koaua bwa antai ngaira ao tera are ti kakoaua. Ti kakoaua bwa Iesu Kristo bon te Tia Kamaiu ao te Tia Kaboa te

aonaaba. E karaoa te mwakuri ni kamaiu ibukia ni kabane ake a raira nanoia man aia bure,ao E motika ana kabaebae te mate ao e na karekea te mangauti man te mate. Ti irira Iesu Kristo. Ao n aron are E taekinna te Uea are Beniamina nakoia ana aomata, ngaia are I kamatoa nakoira ni kabane n te bong aei: “Bwa kam na uringnga n taua arana ao e na koreaki n taainako inanomi” (Motiaea 5:12).

Ti tuangaki bwa ti na tei bwa taani kakooua Ibukina “n taainako ao ni bwaai nako, n taabo nako” (Motiaea 18:9). E nanonaki bwa ti na riai n anganano ni kariaia aomata bwa antai ae ti iriria ao antai ana Ekaretia are ti kainna: ana Ekaretia Iesu Kristo. Ti tangiria ni karaoa aio n tamnein te tangira ao te kakooua. Ti tangiria n irira te Tia Kamaiu man bebete ao ni matata, ae nanorinano, ni katanoata bwa ngaira membwa n Ana Ekaretia. Ti iriria n rikira ae Aomata aika Itiaki—reirei ni bong aika kaitira.

Aomata ao botaki a kona n anganaki aia nikineim irouia tabeman. Te nikineim boni kauarerekean tein te ara, ke e ingoanaki man te tai ae riki ke tabeua baika a rabwata ke tabeua katei. Ngkai nikineim aki ti te arona nneia ke kakawakia n aron aara raoi, a kona ni kabonganaki.

Ana Ekaretia te Uea n taai ake ngkoa ao n taai aikai iai aia nikineim. Aomata aika Itiaki n tain te Nutetemanti aranaki bwa *Kiritian* ibukina bwa a kakooua Iesu Kristo. Te ara anne, e moani kabonganaki n te aro n taumwanta irouia taan tiribure, ngkai ai bon ae kaokoroaki, ao ti rangi n kakatonga n aranaki bwa te aro ni Kiritian.

Raora aika kain te Ekaretia a aranaki bwa Moomon ibukina bwa a kakooua Ana Boki Moomon: Kakoouan taekan Iesu Kristo. Tabemwaang a tia ni kabongana te taeka ae Moomon riki mairouia koraki ake a tia n kitana te Ekaretia. Are a kaira te nanououa. Ti rangi ni kukurei n ana waaki te kareke rongorongon n totokoa te taeka ae Moomon te aro are karika te nanououa nakon te botanaomata ibukin te Ekaretia ma koraki ake a mwaiti buia ke koraki ake a kakaonimaki n kabwaran te rongorongon ae tabu ao manga okiran oin te tua rimoa. N na kamaatata raoi bon akea koraki ake a mwaiti buia, n reitaki ma koraki ake arania bwa Moomon n koaua, ake iai rekerekeia ma Ana Ekaretia Iesu Kristo n Bong Aika Kaitira.

Te ara ae Moomon bon tiaki etin aran te Ekaretia, ao anne are riki aranakina mairouia koraki ake a kaitara n ririki n taai ngkoa n tain te bwainikirinaki, ikanne are e a riki bwa te ara ni kakaniko riki nakoia ake kain te Ekaretia. Ti aki katoka aranakira bwa Moomon ngkana e riai, ma ti na riai n anga raoi kabwaninan ao etin aran te Ekaretia. Irarikin anne, ao ti riai n katoka ao n aki kaungaa atongana “Ana Ekaretia Moomon”.

Inanon ririki ngkai I a tia n kakoroi raoi katabeau n katotobia te aonaaba, ao I a tia n titirakinaki bwa ngai kain te Ekaretia ae te Moomon. Au kaeka are, “Boni ngai kain ana

Ekaretia Iesu Kristo”. Ibukina bwa ti kakoaua Ana Boki Moomon, are e katonuaki iai aran te Burabeti ngkoa iaon Amerika are bon ngaia naba te rongorongonga iaon Iesu Kristo, are n tabetai ao ti aranaki bwa Moomon” Inanon taina ao te kaeka e a tia n reke ao n ukinako are reke iai au tai n kabwarabwara Kaokan bwaninin te Ekaretia n bong aika kaitira.

Tariu ao maneu, iangoia bwa ti na katurua raori ara kaeka n kaota raori aran te Ekaretia ngkai E taekinna te Uea bwa ti na riari n karaoia. Ma ngkana ko aki kona n atonga kabwakan arana n te tai ae waekoa, ma ko a ti atonga, “Ngai bon kain ana Ekaretia Iesu Kristo” ao imwina ko a kabwara nako, “ni Bong Aika Kaitira”

Iai tabeman a titiraki, tera te tiaite n te intanete n aron Mormon.org n reitaki ma tabeua ana itera n kareke rongorongonga te Ekaretia n anainano? N aron are I taku, n reitakiia raori kain te Ekaretia n aroia Moomon ao bon iai riaina. N aron te waaki, koraki ake tiaki kain ara Ekaretia a roko n aron anne n ukoukorira ibukin itera aikai. Ma ngkana ko kauka Mormon.org, ao aran te Ekaretia e a bon kaotaki raori iaon te home page, ao n oota raori iaon te iteraniba iaon te tiaite. E bon aki riari bwa aomata a ana kona n taibina aran te Ekaretia n kabwaninna ngkana a ukoukorira n kakae ngkana a kaman toka iaon ara webutiaite.

Ngkana aei kainnanaoan waaki aika a reitakoko, a na aki tukaki kain te Ekaretia n kamanena bwaninin aran te Ekaretia nakon riaina. Ti riari n uotarake kateira inanon ara utu ao ara Ekaretia n waaki n kakamwakuri ao reitaki n katoa bong n kamatata bwa Ana Ekaretia Iesu Kristo n Bong Aika Kaitira bon te ara are E anga te Uea n ti Ngaia bwa ti na kinaki iai.

Ngkai te katautau iaon te kakae ae teretere e a riaon mwaitia aomata aika a bon aki matataraoi bwa te Moomon e kaineti nakon te Ekaretia. Ao mwaitia aomata a bon aki ataia bwa Moomon bon Kiritian. Riki ngkana a wareka ara ibuobuoki n angabwai nakon te aonaaba imwin te angibuaka, maeiei, ieka ao te rongo, a bon aki kan reitaki n uataboa te nanoanga ma ngaira inanon te botaki n Kiritian. Ti bon ataia bwa e rangi ni bebete irouia bwa a na ataia bwa ti katootonga Iesu Kristo ngkana ti ataia raori bwa ngaira kain ana Ekaretia Iesu Kristo ni Bong Aikai Kaitira. N aron aei ao koraki ake a ongo te ara ae Moomon ana roko n reitaki ma te ara aei bwa koraki ake ana rimwiin Iesu.

N aia reta ni bubuti te Moan Beretitenti n Beberuare 23, 2001. A taekina bwa Kabonganakin kaotan aran Ana Ekaretia Iesu Kristo Ibukia aika Itiaki ni Boong aika Kaitira... , e rikirake kakawakina ni katabeara ni katanoata aran te Tia Kamaiu n kabuta te aonaaba. Ni kaineti ma aio, ti bubuti bwa ngkana ti taekina te Ekaretia ti riari ni kabongana arana ae banin n taainako.

Ngkoa n ririki 1948 n Okitobwa n te maungatabu ni kabuta, Beretitenti George Albert Smith e taku, “Tariu ao maneu, ngkana kam kitana te Bowi n te bong aei ao ane kam na reitaki n mwakuri ma kurubu n ekaretia nako n te aonaaba ae mwaiti, ma uringnga bwa bon ti teuana te Ekaretia n te aonaaba aei ae uota aran Iesu Kristo, ara Uea” (inanon Riboti ni Maungatabu, Okitobwa 1948, 167)

Tariu ao mwaaneu, ti bia uringnga naba aio ngkai ti nang kitana te bowi n te bong aei. Ti na karika ara koaua Irouna bwa e na ongoraeaki ao ara tangira Irouna e na mena inanora n aki toki, I tataro ma te nanorinano n Aran te Uea Iesu Kristo, amen.